

31-3-92

Maria Barla Cavegn, Rueras



(Corr.) Tgi ei pomai puspei morts? Quei ei segir stau lezza damaun, ils 26 da schaner la damonda da biars, cu il zenn grond da Rueras ha tuccau cun siu profund tun lamentont. A Rueras fuva ei gie strusch enconuschent che enzatgi fuss staus malmalsauns? Denton beingleiti ei serasada la nova che la Barla dils «Duri Vigelis» seigi ier sera vegnida liberada da siu malesser, suenter quasi 20 onns da suffrientscha. Segir ha scadin che ha enconuschiu la Maria Barla fatg in bien patratg seregurdond en pietad dalla defuncta.

La Maria Barla ei naschida a Rueras ils 9 da zercladur 1927, sco 10avel affon da Duri Vigeli e Marta Cavegn-Monn. Ella ei stada la giuvna da quater soras. Sia affonza ha ella passentau a Rueras el ravugl d'ina famiglia cun 10 affons. La casa paterna ei per aschidadir stada en l'umbriva dalla baselgia da sogn Giachen, la casa gest sper baselgia. Mintga cass ha era la pintga buobetta

stuiu seschar en e luvrar intensiv cun ils ses en famiglia. Stada carschida ha ei era tuccau alla Maria Barla da serender egl jester. Probabel buca per munconza da lavur a casa, mobein per emprender enzatgei per la veta. Aschia eis ella stada en piazza a Casti e lu dus onns a S. Gagl tier in miedi per emprender igl art da cuschinar. Sco ei sedat en ina famiglia gronda, ils vegls e gronds fundeschan sez famiglia e tenercasa e partan ed aschia ha ei era tuccau alla M. Barla da surprender la truscha dil tenercasa. «Cuschiniera, gliez era ella veramein», ha siu frar Duri detg cun larmas els egls.

Entochen igl onn 1965 ha il bab aunc viviu e la mumma tochen 1968, per ils quals ils treis fargliuns restonts han giu quitau cun carezia e premura en lur vegls dis. Suenter la mort dils geniturs eran ils treis fargliuns en forza e vessen giu bi ensemen. Mo gia igl onn 1972 sefa tier la Barla in malesser sentir ed ella sto savens serender tier miedis ed en spital e casas da cura. Onns ora eis ella denton semudergiada e sesacrificada cun ses fargliuns, mo cun la sanadad sei vegniu adina mender e mender. Onns en ed onns ora ha ella fatg atras ina veritabla via dalla crusch corporalmein e spirtalmein in mal dall'olma. Suenter esser stada cuntinudamein en spitals e casas da cura eis ella serendida ella casa da vegls s. Vigeli a Sedrun, nua ch'ella ha anflau tgira en ses davos onns.

E nus – cu nus vein udiu il zenn da mort? Nus savevan buca tgi che era malsauns. Emblidein nus buca anzi spert nos vegls, nos malsauns, aschi spert sco nus entupein buca pli els? Era quels ch'ei serendi en casa da vegls? Con spert ein nos defuncts e nos morts emblidai? In sincer engraziament a tut quels che segidan per nos vegls e nos bandunai.

A Ti cara M. Barla giavischein nus la consolaziun da Diu, e ruaussa en pasch.

Maria Barla Cavegn, Rueras



Ils 26 da schaner 1992 tucca il zenn da miert a Rueras. Il Segner ha clamau sia survienta la Maria Barla Cavegn tier el a casa. La Maria Barla ei naschida a Rueras ils 9 da zercladur 1927. Ella ei stada il 10avel affon dils geniturs Duri Vigeli Cavegn e Marta nata Monn. Sia affonza e temps da scola passenta ella a Rueras. Suenter quei ventireivel temps tucca ei era alla Maria Barla da serender egl jester. Aschia eis ella stada en piazza a Casti ed a S.Gagl. Returnada a casa ha ella surpriu la truscha e menaschi da casa. Tochen 1965 ha ella giu quita dil bab e tochen 1968 dalla buna mumma ensemen cun ses fargliuns.

Igl onn 1972 sefa in malesser valer tier la Barla. Savens sto ella serender tier miedis, el spital ed ena casas da cura. La sanadad per propi ei buca returnada ed onns ora sto ella semudergiar. Avon entgins onns serenda ella a Sedrun en casa da s.Vigeli. Leu anfla ella ina buna tgira en ses davos onns.

Cun la mort ha il Segner clamau e spindrau la Barla da ses mals terresters. Ella meretta la consolaziun da Diu e ruaussi en la beada pasch.